


Кылбуран жыт

Тури весез но төдды пужыё

Татьяна Черновалэн «Туривесь» но «Төдды пужыё инкуазе» книгаосыныз тодматскон



Татьяна Чернова (бурсыез) Дарали Лели нылыныз но кибашлыен Татьяна Москвинаен.



Дмитрий но Игорь Уткинёс шулдыр кырзасы.

Йёскалык библиотека-ын 15-тй толсур нуналэ тунсыко кыло-буро жыт ортчиз. Со Татьяна Чернова кылбурчилэн алигес потэм «Туривесь» но «Төдды пужыё инкуазе» книгаосыныз тодматскон вал. Пусыймон, та ужрад чапак авторлэн вордскем нуналэныз тупаз.

Татьяна Чернова 20 арлэсь кема бичетгёссэ өз потта ни вал, соин ик кылбуретэзлэсь мөзмон мылкыд татын шараяськиз. Кылёсызья гожтэм кырзангёс но сое шөдытйзы. Эльвира Панченко, Чупай Эли, калык азе нырысьсэ поттйз «Пиосмуртлы» кырзангёс. Дмитрий но Игорь Уткин агайвынёс быдэстйзы атайзылэсь Николай Уткинлэсь тодмо луэм гурёссэ: «Мон тынад тодад-а?» но «Пумиськон» («Шуныт-шуныт...»). Нош «Тон — мынам сюлэм висёнэ» 3 пол чузьяськиз та жытэ. Удмуртиысь калык артистка Надежда Уткина сяна, солы виль улон кузьмазы «Зарезь» виль группаысь егитгёс. Озы ик экранысь но та кырзан пиштйз, Татьяна Черновалэн Румыниын ульсь Настя Деметэр-Петрова нылыз но Катаен Дёнди нуныкаосыз быдэстэм улсын. Любовь Быковалэн туж тодмо «Вордйськем нунал» кырзангёс но та нуналэ чапак иназ луиз.

Пумиськонын котькинлэн ик мылкыдыз жутскемын вал. Библиотекалэн кивалтйсьез Татьяна Тензина, кылбурчи

зечкылан кылёсын вазиськыса, библиотекалэсь Таукарон кузьмаса, «Трос-а кулэ милемлы?» кылбурзэ нырысьсэ удмурт кылын мыло-кыдо лыдзиз. Удмуртиысь культура министр Владимир Соловьёв, нылкышно гожьяськисез дуньяса, «Чеберина» кылбурезлэн улонэ пычабез сярись пыр-почгес мадиз. Та жыт удмурт нылкышнолэсь чеберзэ, йонлыкэс усьтон но луэ. Соны юртгйзы Йёскалык театрысь артисткалэн Марина Самсоновалэн Т. Черновалэсь «Удмурт ныл» кылбурзэ удмурт но зуч кылын усто лыдземез, озы ик Татьяна Николаевналэн Алёна (Дарали Лели) нылызлэн туала дйсьёсын виль коллекциез, кудзэ возматйзы «Эльнул» студиысь нылгёс.

«Удмуртия» книгапоттонниын туэ гудырикошконэ вордскем «Туривесь» бичетысь сяна, та жытэ Румыниысь Трансильваниысь Коложвар карын (татын трос венгерёс уло) та толэзе ик поттэм «Төдды пужыё инкуазе» книгалэн бамгёсыз усьтйськизы. Татьяна Черновалэсь кылбурёссэ венгер кылэ берыктйз актёр, кырзась но кылбурчи Роберт Лацко Вашш. Кылбурёс 2 кылын, удмурт но мадьяр сямен, артэ сётэмын. Авторлэн пөртэм арьёсы гожьямгёсыз та. Книга поттэмын Венгриысь культура фонд коньдонэн юрттэм улсын. Кызы ужаз Анастасия Деметэр-Петрова анаезлэсь чурёссэ печате дасян бордын, со сярись тодыны быгатим видео адзйтонись.

Озы та жытлы аспөртэм шөм пычатйз кылбурёслэн венгер кылын чузьяськемзы. Егит мадьяр тодосчиослэн Ребека Кубитчлэн но Золтан Неметлэн авторлэсь тумошо учырёсын герзаськем кылбурёссэ удмурт кылэз тйяса лыдземысьтызы, серем пырыос «пуштылызы» ик, залын шулдыр мылкыд бугырскылыз.

Та сяна, 2000-тй арын Удмурт театрын пуктэм «Айна» крезьгуро драмаысь пичи люкетэз возматэмын вал. Пьеса бордын Т. Черноваен чош ужамзы сярись вераз Удмуртиысь культура удысысь дано ужась, режиссёр Василий Ушаков. Лыктэмгёс сак кылзйзы гожьяськон удысысь тодосчиослэсь дунгет сётыса вераськемзэс. Писатель но критик Александр Шкляев шуиз: Татьяна Черновалэн творчествояз мылкыдлэн бугырьяськемез импрессионизмлы матын. Нош Удмурт кылобурья, финноугроведения но журналистика институтлэн директорез Галина Глухова эскеремгёссэ фольклорен герзаса вераз, уката ик Обыда кышномуртлэн

кылбуре пырем сямыз-тусыз пумысен.

Йёскалык прессалэн юртэныз кивалтйсь Зинаида Рябинина тодаз вайиз Т. Черновалэсь «Удмурт дунне» газетын тыршемзэ, чылкыт но узыр кылтйрлыкэс. Татьяна Николаевналэн нылгёсыз но кылбурёс кадэсь, шуиз З. Рябинина. Ачиз кылбурчи та жыт сярись вера:

— Куддыргья юбилеез пусьён но тагё бугырес капчи, шулдыр мылкыдо уг луы.

Сайкыт толалтэлы тупась тури весе но төдды пужыё. Эгра ёросысь вордскем гуртысьтым Зураысь — Гондыркушысь — Диана Шкляевалы, Маша нылыныз, Ульяна кенэныз перепечен-маин лыктэмзылы но туж шумпотй. Бадзым тау карисько ваньдылы, эшгёсы, дуно куноосы! Озы ик библиотекаын ужасёслы жытэз сюлмысь дасямзы-нуэмзы понна.

Татьяна ИВАНОВА

УдГУ-ысь Удмурт кылобурья, финно-угроведения но журналистика институтлэн директорез Галина Глухова:

— Татьяна Черновалэн «Туривесь» сборникезлэн нимыз мур пуштросо. Со чеберман понна гинэ өвёл. Нимыз но, кылбурёсез ватэм пусьёс но авторлэсь пуш дуннезэ возматэ. Туж яркыт кылбурез «Чебер муртлы ке синмаськид». Татын асьмеос адзйськомы шудэн, куректонэн, мөзмонэн, яратонэн кыдам кышномуртэз. Яратон со понна вожаняська өвёл ни, кытын лирической героиня яратонэз понна нюръяськыны дась. Азвыл кылбурёсез солэн яратонэз — чылкыт ошмес ке, дыр ортчыса, со бадзым шурлы яке шур сопалась вуюисьлы пөрме.

Чош ужам эшез Лия Малых:

Татьяна Черновалэн жытэз туж шуныт вал: сюлмын журам кылбурёс но ачиз кылбурчи сярись сюлмысь сюлме вераськон, сюлмысь зечкылангёс, сюлмысь кырзангёс, синкылиос потымон сюлмысь серекьян.

Инбамын чили-били
Кырмышья юг кизили.
Исаське Чулпон, ведна,
Кылбурчи уг көл, визна.
Блеснаяз дэмзиз хорей,
Зыгатъяз на ямб, ей-ей!
Каньылля, дышем сямъя,
Кылбурёс гожьян ритмъя
Такъянай шедьтоз лулгур,
Чильпалоз вильзэ кылбур.

